

LOS PONTANARDS

I

Sem Pontanards, amai nos fasem gloria,
Envetjam pas los d'un autre país.
Avem aici pro jòia,)
Tant o mai qu'a Paris.) bis

II

Los emplegats, tan plan fan la grimaça
Quand aprenon que son nommats aici.
Aprèp quand son en plaça)
Volon pas pus partir.) bis

III

L'ivèrn, fa freg, coma sus la montanha
Mai tremolan pas quand lo vesem venir :
Que dins nòstre campanha)
Avem per nos sufir.) bis

IV

Per nos cobrir avem pro de lana
Per nos caufar nos manca pas de boès
Laissan bufar la cisampa)
Quand sem plan calds al lièch.) bis

V

Matin e ser, pregan lo que far nàisser
L'auton lo blat, las erbas al printemps.
Demandan que nos laisse)
Lo gost del pan longtemps.) bis

VI

Tenguem la piocha o tenguem la gulhada,
Que meissonem o que dalhem lo prat,
Lo trabalh nos agrada)
Amái la libertat.) bis

VII

Avem un jutge amai quelques gendarmas
Lor donam pas plan de trabalh aici :
Aimam pas las chicanas,)
Ni mai lo plaidejadis.) bis

VIII

Quand nos parlam, aimam pas la falsiera,
E quand cantam, aimam de nos far ausir :
Cafès, combas e glèisa)
Fasem tot retronir.) bis

IX

Al País Bas nos tractan de « Gavaches »
 Se per azard lor agradabem pas
 Consí tant de viatges)
 Que fan per nos trovar.) bis

X

A Marcilhac son fièrs de lor vendemia,
 Sens gelosiá los laissez regaudir.
 Elses fòsan la vinha,)
 Nosautres bevem lo vin.) bis

XI

Nòstres tropels de vacas e de fedas,
 De lach emplisson e ferrats e bidons.
 Nos gaghan mai monedas)
 Que lo vin dels valons.) bis

XII

Al cabaret per jogar la manilha
 Ambe d'amics nos donam rendètz-vos,
 Fasem portar de brillas)
 O servir de tripons.) bis

XIII

Levat carnaval res nos empacha
 Sagnam lo pòrc, metem l'auca al topin,
 Metem un piòt a l'asta)
 Per far nòstre cobit.) bis

XIV

Dins cada ostal la perga de salsissa
 Que penja amont, ambe los cambajons;
 Ta plan que fa malícia)
 Als paures villatons.) bis

XV

Vendrián aici pescar las trochas piadas
 Mas sem d'avís qu'aquò es nòstre afar
 An ben lors passejadas)
 Amai lor cinema.) bis

XVI

De tant de ben que Dieu a fach als òmes
 Remerciem lo de nòstre bona part.
 Cantem coma de trònes :)
 Viva Pont de Salars!) bis

Séverin LAFON
 Curé de Pont de Salars
 1942